

## VI.

*Lettre de Guillaume de Nassau, prince d'Orange, aux Magistrats de la ville d'Ypres. — Il désire que l'on donne au capitaine Jacques de Cherf, seigneur de Winterhove, une compagnie d'infanterie. (Arch. Y.)*

MESSIEURS.

Ayant entendu qu'estiez deliberé de faire lever quelques compagnies de gens de pied, et qu'il sera necessaire d'y commectre pour cappitaines, personnes qualifiées confidentes et bons patriotes, et m'estant faict rapport des bonnes quallitez du s<sup>r</sup> Jacques de Cherf, s<sup>r</sup> de Winterhoven s'estant trouvé icy devers moy presenter son service pour l'avancement des affaires de la patrie. C'est cause qu'ay bien voulu vous faire la presente pour vous prier d'avoir le d<sup>t</sup> s<sup>r</sup> de Winterhove pour recommandé le favorisant a ce qu'il puisse avoir charge d'une compagnie de celles qui se leveront en vos quartiers. Et me ferez bien singulier plaisir veillant aussy esperer qu'en recepvrez tout bon service a votre contentement et au bien du pays, qui me faict encore un coup vous le recommander et prier Dieu qu'il vous ayt

1578  
2 Mars.

Messieurs en sa S<sup>te</sup> garde et protection, Escript en Anvers ce  
ii de mars 1578.

Votre bien bon amy a vous faire service,  
GUILLE DE NASSAU.

Messieurs.

Messieurs les Burgmres Eschevins et Conseil  
de la ville d'Ypre.

